

LA LENGHE FURLANE E LIS LENGHIS STORICHIS DE REGJON: PE DIFESE DE AUTONOMIE E DE SPECIALITÂT, PE DEMOCRAZIE, PAL PROGRÈS

1. IL PARCÈ DI CHESTE INIZIATIVE

Lis riflessions che a son stadis davueltis dulinvie de Conference regionâl di verifiche e proposte su la lenghe furlane, tal mêś di Dicembar stât, nus sburtin a indreçâ chestis considerazions aes listis eletorâls e ai candidâts ae Presidence de Regjon, domandant une rispueste a rivuart, cul intindiment di:

- a) ufrî ai citadins la pussibilitât di cognossi il pinsîr dai candidâts suntun aspjet une vore impuartant de vite politiche, ven a stâi la pluralitât des lenghis storichis de Regjon: furlan, sloven e todesc;
- b) meti la cuestion des lenghis storichis de Regjon, come che al è just, tal centri dal dibatiment public, no dome eletorâl;
- c) mutivâ che la presince massive di lenghis diferentis di chê taliane al è il motîf di fonde de autonomie e specialitât de Regjon e la lôr valorizazion il mieç miôr par difindile di atacs che a vegnin di plui bandis;
- d) mostrâ che la pussibilitât di doprâlis in ogni situazion comunicative, intune suaze plurilengâl, al è un element no discutibil par une vere e concrete democrazie e pe coesion sociâl; mostrâ che in dutis lis situazions li che si à inviât une serie e democratiche politiche linguistiche, cheste e à metût in vore savês, competencis e procès di inovazion che a àn miorât la situazion economiche tal so complès.

In coerence cun chescj resonaments **o sometìn ai candidâts chestis considerazions** in maniere puntuâl **e in maniere puntuâl ur domandìn une rispueste.**

2. SUAZE E IMPRESCJ DE E PE POLITICHE LINGUISTICHE

2.1 Rinfuarcî lis azions a pro des lenghis minoritariis cun normis di atuazion dal Statût

Par ce che al tocje la normative, daûr des indicazioni fatis indenant ancje de bande de Cort Costituzionâl, al covente un intervent tal cjamp des normis di atuazion dal Statût speciâl di autonomie de Regjon, là che al coventarès un inzornament e un infuartiment des previsionis che a toçjin la azion amministrative de Regjon in cont de tutele des minorancis linguistiche e de promovion des lôr lenghis.

2.2 Coordinament des politichis a pro des lenghis storichis sot de Presidence de Regjon

Une politiche ative de Regjon a pro des sôs lenghis storichis e constituìs no une specifiche funzion ma un principi bon par ducj i assessorâts e par ducj i uficis regionâi, duncje la figure che e à di soreintindi e coordinâ chest principi e je chê de Presidence de Regjon, superant la division di competencis in plui assessorâts e uficis. Cheste e permetarès ancje

un coordinament plui stret cun chês altris regions a statût speciâl che a fondin la lôr autonomie su la presince di lenghis diferentis dal talian.

2.3 ARLeF operatîf cun personâl stabil

Tal câs specific dal furlan, al covente recuperâ ad implen la vision originarie de ARLeF tant che organism di politiche linguistiche. incressint il so potenziâl sientific cun personâl di pueste stabil.

2.4 Formâ e cjapâ sù personâl preparât cun competencis specifichis

E esist la dibisugne di indotâ la strutture regionâl di figuris che a vedin competencis sul furlan che cualchi volte no esistin tal organigram regionâl. La eficacitât des politichis si fonde su la valorizazion des competencis dal personâl za in servizi ma si scugne pensâ a gnovis figuris preparadis e cun certificazions in cont des lôr competencis linguistichis sedi in Region che tal sisteme des autonomiis.

2.5 Gjeneralizâ i plans speciâi di politiche linguistiche e lis azions di promoziun de lenghe

Al è stât fat bon il Plan Gjenerâl di Politiche Linguistiche, l'imprest di programazion strategjiche sui temis de identitât e de lenghe furlane, ma la Region e à di promovilu e di fâlu cognossi a dut il sisteme des autonomiis e dai concessionaris di servizis publics, sburtant par che a adotin i lôr Plans Speciâi, dant prin di dut il bon esempi cu la redazion dal so. A coventin anje campagnis di promoziun dal furlan e dal plurilinguism in gjenar indreçadis a dute la popolazion.

2.6 Imprescj pe cognossince sociolinguistiche e di documentazion de produzion par furlan

Une politiche linguistiche serie si fonde su une cognossince de situazion sociolinguistiche che e dedi indicazioni su cuâi che a son i elements fuarts e chei debui te politiche di tutele, in maniere di valorizâ chei e di comedâ chei altris. Duncje scandais periodics a son necessariis par indreçâ la politiche linguistiche a pro dal furlan. Ancjetant al covente un imprest di documentazion gjenerâl su ce (libris, periodics, risorsis eletronichis, etc.) che al ven produsût par furlan che lu fasi cognossi e lu valorizi.

3. ISTRUZION E FORMAZION PLURILENGÂL

3.1 Trasferî risorsis e competencis su la istruzion ae Region

Inviâ il percors par trasferî ae Region autonome Friûl - Vignesie Julie lis funzions e lis competencis in materie di istruzion, tignint cont de pluralitât linguistiche ricognossude e de sô colocazion gjeografiche di confin, di intindi tant che oportunitât di disvilup di impuartantis sinergiis cui stâts europeans. Lis atribuzions des aministrazions dal Stât in materie di istruzion a àn di jessi esercitadis, tal ambit dal so teritori, de Region autonome Friûl - Vignesie Julie, cjapant dentri lis funzions in materie di stât juridic e economic dal personâl docent, educatîf, dirigjenziâl e ispetîf des scuclis di ogni ordin e grât de Region.

3.2 Formazion iniziâl e in servizi dai docents di furlan

Potenziâ, cun percors universitaris seris, la formazion iniziâl e in servizi dai docents di furlan intun contest plurilengâl.

3.3 Certificazion des competencis dai docents

Promovi la certificazion des competencis dai docents di furlan tignint cont des competencis formâls, no formâls e informâls.

3.4 Insegnament dal furlan in ducj i ciclis di istruzion intune suaze plurilengâl

Slargjâ l'insegnament dal furlan a ducj i ciclis di istruzion e introdusi un autentic plurilinguism.

3.5 Regjie regionâl serie su la scuele plurilengâl coinvolzint la societât

Costituî une regjie regionâl serie sul furlan e su lis lenghis minoritariis te scuele cul obietîf di curâ la comunicazion cun ducj i puartadôrs di interès, il monitorament des azions, la organizazion curricular, la valutazion, la progjetualitât europeane.

4. ÛS PUBLIC DE LENGHE FURLANE

Intal cjamp dal ûs public de lenghe furlane si domande che si meti pardabon in vore in maniere coerente, organiche e cussiente, la normative statâl e regionâl di tutele. In particolâr a vegnin fatis indenant chestis propuestis:

4.1 Competencis intes lenghis furlane, slovene e todescje tant che requisîts acessoris pe selezion dal personâl public

Si à di calcolâ lis competencis intes lenghis furlane, slovene e todescje almancul tant che un requisît accessori pe selezion dal personâl intal setôr public e in particolâr inte aministrazion regionâl e intai ents locâi, là che la Regjon e pues intervignî in maniere direte daûr dal articul 4 dal so Statût in vore. Cheste e je une azion che e da valôr concret aes lenghis "altris" de regjon, ae lôr cognossince e al lôr ûs e che e permet di slargjâ la presince di chês stessis lenghis te aministrazion e tai servizis, a pro de inressite de cualitât, de eficacitât e de democraticitât de ativitât amministrative e dai servizis.

4.2 Formazion linguistiche pal personâl

La formazion linguistiche pal personâl e à di jessi metude dentri de ufierte formative pai dependents dai ents publics, dai servizis sanitaris e des societâts concessionariis di servizi public, cun chês stesse dignitât di chei altris cors di inzornament professionâl.

4.3 Cjarte di identitât bilengâl ancje par furlan

Si à di cjatâ une rispueste positive e unitarie ae domande di vê la cjarte di identitât bilengâl (talian/furlan) fate indenant de bande di tancj citadins, massime vie pai ultins agns.

5. MIEÇS DI INFORMAZION

I mieçs di informazion a rapresentin un imprest fundamentâl pe promozion e pal disvilup des lenghis minorizadis. O sin une vore lontans dal viodi ricognossût il dirit di vê transmissions radiotelevisivis in lenghe furlane tal servizi public radiotelevisîf, che al cjate la sô fonde te leç statâl 482/99.

5.1 Sburtâ sul guvier talian par une convenzion cu la RAI plui favorevule

O sin in spiete de aprovazion de convenzion tra Presidence dal Consei dai Ministris e Rai te suaze dal gnûf contrat di servizi tra Ministeri pal disvilup economic e Rai, che e varès di garantî la programazion radiofoniche atuâl (90 oris) e, pe prime volte, previodi transmissions televisivis par furlan (90 oris). E covente une pression fuarte e convinte sul gnûf Guvier talian.

5.2 Pontâ a une strutture di programazion RAI autonome par furlan

I programs atuâi de Rai ju guvierne une strutture pe programazion taliane. Ben al sarès rivâ a fâ sù une strutture adeguate dal pont di viste tecnologjic e di spazis, permanente, dedicate ae programazion in lenghe furlane, cun personâl formât e stabilizât e cun sede a Udin, che e podarès diventâ ancje un centri di riferiment e di produzion par altris lenghis minorizadis.

5.3 Sostignî cun fuarce i privâts che a produsin o a progjetin tal cjamp de informazion par furlan

Ai mieçs di informazion privâts, che tal cjamp de informazion radiofoniche a fasin di agns di suplence aes mancjancis dal servizi public, ai produtôrs audiovideo che di agns a investissin tal setôr, a chei che a voressin impegnâsi te informazion a stampe o te rêt si à di dâur une rispueste in tiermins di juscj finanziaments pal lôr servizi, reâl o potenziâl, di utilitât publiche.

Come che o vin za scrit disore chescj a son ponts, che no esaurissin dut il panorame di dibisugnis de lenghe furlane ma a son fundamentâi pal so disvilup, che a domandin, un par un, une rispueste a rivuart.